

Qaammatit arfinillit Frankrigimi

Ivalo & Minik Fonden aningaasaliisoralugu Frankrigimi Paris-ip eqqaaniittumi Université de Versailles St Quentin En Yvelines-imi semesterimi ataatsimi ilinniarpunga. Qaammatit arfinillit Frankrigimiininni ilinniarninnut nunarsuarmiooqataanernullu sunniutaalluinnarpoq.

Frankrigimut aallanginninni pingaartissimavara universitetimik uannut tulluurtumik qinersinissaq, taamaammat ilisimatusarfiup nunani allani universitetit suleqatai tamarmik misissorpakka. Université de Versailles St Quentin En Yvelines qinerpara pissutigalugu nunat avannarliit pillugit ilisimatusarnermut tunngasunik ilinniartitsisarmata – aamma Alaska, Canada, Finland, Island, Norge, Sverige, Rusland USA-lu periarfissaagaluartut Frankrigimukarnissaq qinersimavara Frankrigip piorsarsimassusaa, nerisassaataat oqaasiillu immikkuullarissut tusaamasaassutaat ilinniarfigerusullugittaaq.

Januar 2016-imi Frankrigimukarlunga kisima aallarpunga. Unammillernartussat piareersimaffigalugit. Universitetissannut pigama tupannaqisumik paasitineqarpunga, akuersinikuugaluarlutik, ilinniarfissara semesterimi tassani ilinniartitsissutigineqalinngitsoq, allatulli ajornaqimmat immikkut akuerisaallunga faaginik allanik qinersinissannut (qujanartumik) akuerisaavunga, kukkussutertik aaqqinniassagamikku. Takorloorsimanginnakku allanik ilinniarnissaq pakatsigaluarlunga aaliangertariaqarsimavunga unammillernartoq ajunngitsumut saatinniarlugu faaginillu soqutiginarunik marlunnik qinersillunga.

Fagerisara siulleq qaammatip ataatsip iluani naammassimmat, semesterip sinnera ataasimik faageqarpunga sapaatillu akunneramut ataasiaannarlunga atuartarlunga. Taamaattumik Frankrigimi ilinniarnera namminersornernerusumik ingerlallugu. Tamanna uggornaqutigaa Université de Versailles St Quentin En Yvelinesimi ilinniartuuneq qanoq ippiarnersoq iluamik iserfiginnginnakku – qujanartumilli ilinniartoqatinnik, nunanit assigiinngitsuneersunit naapitsinera misigititsivoq nunarsuarmiooqataanermik, piorsarsimassusaannillu ilisimasaqalernermik. Minnerunngitsumillu Franskit inooriaasaat oqaasiillu ilinniarakkit inuttut pisuunnguallatsippot. Semesteri naammassimmat misigisara naammangittutut nalilerakku, aaliangersimavunga nunami allami ilinniarneq ingerlateqqinniarlugu.

Taamaammat oqarsinnaavunga Frankrigimi semesterernej qujanartumik naammaginangitsumik misigalugu, ilami 2017-miit 2018-mut Ivalo & Minik Fonden aningaasaliisoreqqillugu Australiami International Communications Masterinngorniarnej ingerlattussaagakku – tasanilu nunami allami ilinniarnej iluamik iserifigisussaallugu misilittagaqarfigilluartussaallugulu.

Nunamut allamut ilinniariartut uattulli nalaataqariasaassagaluartut (universitetip kukkussutigisaannik misigisassat killeqariasaassappata) siunnersorusuppakka, unammillernartoq suugaluarpat ajunngitsumut sangutinissaa pingaartissagaat, nunamimi allami misigisassat Kalaallit Nunaannut sanilliullugit allaanerummata ilinniarfigineqarsinnaallutillu assigiinngitsutigut, inuttut ilinniarfigineqarsinnaasutaaq – namminerimi aamma atuarfiup saniatigut ilinniarneqarsinnaasorpasuit ammapput, periarfissarseeraanni nanineqarsinnaajuannarlutik. Uanga atuarnerma saniatigut qinernikuuara Franskit oqaasii ilinniarnissaat, Frankrigimi inooriaaseq atuartullu allat attaveqarfigalugit ilikkagaqarfigakkit ikinngutigilerlugillu qutsatigaara Ivalo & Minik Fonden aningaasaliisoralugu misigisakka misigisinnaagakkit. Université de Versailles St Quentin En Yvelinesimi ilinniariartussat, universiteti kukkoqqinngippat, takorloorsinnaavakka universitetimi ilinniarnej misigisaqarluarfigiumaaraat.